

新唐书

文藝列傳上第一百二十六

唐書二百一

唐有天下三百年文章無慮三變高祖太宗大難始夷沿江左餘風絺句繪章揣合低卽故王楊爲之伯玄宗好經術羣臣稍厭雕琢索理致崇雅黜浮氣益雄渾則燕許擅其宗是時唐興已百年諸儒爭自名家大曆貞元閒美才輩出擣齷道真涵泳聖涯於是韓愈倡之柳宗元李翱皇甫湜等和之排逐百家法度森嚴抵轍晉魏上軋漢周唐之文完然爲一王法此其極也若侍從酬奉則李嶠宋之問沈佺期王維制冊則常袞楊炎陸贄權德輿王仲舒李德裕言詩則杜甫李白元稹白居易劉禹錫譎怪則李賀杜牧李商隱皆卓然以所長爲一世冠其可尙已然嘗言之夫子之門以文學爲下科何哉蓋天之付與於君子小人無常分惟能者得之故號一藝自中智以還恃以取敗者有之朋姦飾僞者有之怨

望訕國者有之若君子則不然自能以功業行實光明于時亦不一于立言而垂不腐有如不得試固且闡繹優游異不及排怨不及誹而不忘納君於善故可貴也今但取以文自名者爲文藝篇若韋應物沈亞之閻防祖詠辭能鄭谷等其類尙多皆班班有文在人閒史家逸其行事故弗得而述云

袁朗其先雍州長安人父樞仕陳爲尙書左僕射朗在陳爲祕書郎江總尤器之後主聞其才詔爲月賦一篇灑然無畱思後主曰謝莊不得獨美於前矣復詔爲芝草嘉蓮二頌歎賞尤厚累遷太子洗馬德教殿學士陳亾入隋歷尙書儀曹郎武德初隱太子與秦王齊王相傾爭致名臣以自助太子有詹事李綱竇軌庶子裴矩鄭善果友賀德仁洗馬魏徵中舍人王珪舍人徐師暮率更令歐陽詢典膳監任瓌直典書坊唐臨隴西公府祭酒韋挺記室參

軍事庾抱左領大都督府長史唐憲秦王有友于志寧記室參軍
事房玄齡虞世南顏思魯諮議參軍事竇綸蕭景兵曹杜如晦鎧
曹褚遂良士曹戴胄閣立德參軍事薛元敬蔡允恭主簿薛收李
道玄典籤蘇幹文學姚思廉褚亮燉煌公府文學顏師古右元帥
府司馬蕭瑀行軍元帥府長史屈突通司馬竇誕天策府長史唐
儉司馬封倫軍諮祭酒蘇世長兵曹參軍事杜淹倉曹李守素參
軍事顏相時齊王有記室參軍事榮九思戶曹武士逸典籤裴宣
儼朗爲文學從父弟承序亦有名王召爲文學館學士朗累封汝
南縣男再轉給事中卒太宗爲廢朝一日謂高士廉曰朗任淺而
性謹厚使人悼惜詔給喪費存問其家朗遠祖滂爲漢司徒自滂
至朗凡十二世其閒位司徒司空者四世淑顛察皆歿宋難昂著
節齊梁時朗自以中外人物爲海內冠雖琅邪王氏踵爲公卿特

以累朝佐命有功鄙不爲伍朗孫諡神功中爲蘇州刺史司馬張
沛者侍中文瓘子嘗白諡曰州得一長史隴西李亶天下甲門也
諡曰夫門戶者歷世名節爲天下所高老夫是也山東人尙婚媾
求祿利耳至見危授命則無人焉何足尙邪沛大慙承序爲齊王
元吉府學士府廢補建昌令治尙慈簡吏民懷德高宗之爲晉王
也太宗崇選僚屬問梁陳名臣子弟誰可者岑文本曰昔陳亾百
司奔散有袁憲者朝服立後主傍白刃不避也王世充篡隋羣臣
表勸進而憲子給事中承家稱疾不冝署今其少子承序風操清
亮無愧先烈帝乃詔拜晉王友兼侍讀加弘文館學士卒朗從祖
弟利貞陳中書令敬孫高宗時爲太常博士周王侍讀及王立爲
太子百官上禮帝欲大會羣臣命婦合宴宣政殿設九部伎散樂
利貞上疏諫以爲前殿路門非命婦宴會倡優進御之所請徙命

婦別殿九部伎從左右門入罷散樂不進帝納之既會帝傳詔利貞曰卿奕葉忠鯁能抗疏規朕之失不厚賜無以勸能者乃賜物百段擢祠部員外郎卒中宗立以舊恩追贈祕書少監

賀德仁越州山陰人父朗終陳散騎常侍德仁與從兄德基師事周弘正以文辭稱人爲語曰學行可師賀德基文質彬彬賀德仁兄弟八人時比漢荀氏太守鄱陽王伯山改所居甘滂里爲高陽云始德仁在陳爲吳興王友入隋楊素薦其材授豫章王記室王遇之厚徙封齊復爲府屬王廢官吏抵罪而德仁以忠謹獲貰補河東司法參軍素與隱太子善高祖起兵太子封隴西公以德仁爲友庾抱爲記室俄竝遷中舍人以年耆不更吏職徙洗馬與蕭德言陳子良皆爲東宮學士貞觀初遷趙王友卒從子紀欽亦博學高宗時紀爲太子洗馬豫修五禮欽率更令兼太子侍讀皆爲

崇賢館學士抱者陳御史中丞眾孫開皇中爲延州參軍入調吏部尙書牛弘給筆札令自序援筆而成爲元德太子學士會嫡皇孫生大宴坐中獻頌太子嗟賞及在隴西府文檄皆出其手

蔡允恭荊州江陵人後梁左民尙書大業子美姿容工爲詩仕隋歷起居舍人煬帝言所賦必令諷誦遣教宮人允恭恥之數稱疾授內史舍人俾入宮固辭繇是疎斥帝遇弒經事宇文化及竇建德歸國爲秦王府參軍文學館學士貞觀初除太子洗馬卒著後梁春秋

謝偃衛州衛人本姓直勒氏祖孝政仕北齊爲散騎常侍改姓謝偃在隋爲散從正員郎貞觀初應詔對策高第歷高陵主簿太宗幸東都方穀洛壞洛陽宮詔求直言偃上書陳得失帝稱善引爲弘文館直學士遷魏王府功曹嘗爲塵影賦二篇帝美其文召見

欲偃作賦先爲序一篇頗言天下又安功德茂盛意受偃使賦偃
緣帝指名篇曰述聖帝悅賜帛數十初帝卽位直中書省張蘊古
上大寶箴諷帝以民畏而未懷其辭挺切擢大理丞偃又獻惟皇
誠德賦其序大略言治忘亂安忘危逸忘勞得忘失四者人主莫
不然桀以瑤臺爲麗而不悟南巢之禍殷辛以象箸爲華而不知
牧野之敗是以聖人處宮室則思前王所以亾朝萬國則思己所
以尊巡府庫則思今所以得視功臣則思其輔佐之始見名將則
思用力之初如此則人無易心天下何患乎不化哉且行之堯舜
暮失之桀紂豈異人哉其賦蓋規帝成功而自處至難云又撰玉
謨真紀以勸封禪時李百藥工詩而偃善賦時人稱李詩謝賦府
廢終湘潭令蘊古洹水人敏書傳曉世務文擅當時後坐事誅
崔信明青州益都人高祖光伯仕後魏爲七兵尙書信明之生五

月五日日方中有異雀鳴集庭樹太史令史良爲占曰五月爲火
火主離離爲文曰中文之盛也雀五色而鳴此兒將以文顯然雀
類微位殆不高邪及長彊記美文章鄉人高孝基嘗語人曰崔生
才富爲一時冠但恨位不到耳隋大業中爲堯城令竇建德僭號
而信明族弟敬素者爲賊鴻臚卿自謂得意語信明曰夏王英武
有舉天下心士女襁負而至不可數兄不以此時立功立事豈所
謂見機不俟終日乎荅曰昔申胥海隅釣師能固其節爾欲吾屈
身賊中求斗筭邪遂踰城去隱太行山貞觀六年有詔卽家拜興
勢丞遷秦川令卒信明蹇亢以門望自負嘗矜其文謂過李百藥
議者不許揚州錄事參軍鄭世翼者亦驚倨數忮輕忤物遇信明
江中謂曰聞公有楓落吳江冷願見其餘信明欣然多出眾篇世
翼覽未終曰所見不逮所聞投諸水引舟去世翼鄭州滎陽人周

儀同大將軍敬德孫貞觀時坐怨謫流歿州謾交游傳行於世
信明子冬日武后時爲黃門侍郎爲酷吏誣歿

劉延祐徐州彭城人伯父胤之少志學與孫萬壽李百藥相友善
武德中杜淹薦爲信都令有惠政永徽初以著作郎弘文館學士
與令狐德棻陽仁卿等撰次國史并實錄以勞封陽城縣男終楚
州刺史延祐擢進士補渭南尉有吏能治第一李勣戒之曰子春
秋少而有美名宜稍自抑毋爲出人以上延祐欽納後檢校司賓少
卿封薛縣男徐敬業敗詔延祐持節到軍時吏議敬業所署五品
官殊歿六品流延祐謂誣脅可察以情乃論授五品官當流六品
以下除名全宥甚眾拜箕州刺史轉安南都護舊俚戶歲半租延
祐責全入眾始怨謀亂延祐誅其渠李嗣仙而餘黨丁建等遂叛
合眾圍安南府城中兵少不支嬰壘待援廣州大族馮子猷幸立

功案兵不出延祐遇害桂州司馬曹玄靜進兵討建斬之延祐從弟藏器高宗時爲侍御史衛尉卿尉遲寶琳脅人爲妾藏器劾還之寶琳私請帝止其還凡再劾再止藏器曰法爲天下縣衡萬民所共陛下用舍繇情法何所施今寶琳私請陛下從之臣公劾陛下亦從之今日從明日改下何所遵彼匹夫匹婦猶憚失信況天子乎帝乃詔可然內銜之不悅也稍遷比部員外郎監察御史魏元忠稱其賢帝欲擢任爲吏部侍郎魏玄同沮曰彼守道不篤者安用之遂出爲宋州司馬卒子知柔性簡靜美風儀居親喪廬墓側詔築闕表之歷國子司業累遷工部尙書開元六年河南大水詔知柔馳驛察民疾苦及吏善惡所表陳州刺史韋嗣立汝州刺史崔日用兗州刺史韋元珪苻離令綦毋頊等止二十七人有治狀久之遷太子賓客封彭城縣侯致仕給全祿終身遺令薄葬祖

載服用皆自處其費贈太子少保諡曰文弟知幾別有傳

張昌齡冀州南宮人與兄昌宗皆以文自名州欲舉秀才昌齡以科廢久固讓更舉進士與王公治齊名皆爲考功員外郎王師旦所絀太宗問其故答曰昌齡等華而少實其文浮靡非令器也取之則後生勸慕亂陛下風雅帝然之貞觀末翠微宮成獻頌闕下召見試息兵詔少選成文帝大悅戒之曰昔禰衡潘岳矜己傲物不得死卿才不減二人宜鑒于前副朕所求乃敕於通事舍人裏供奉俄爲崑山道記室平龜茲露布爲士所稱賀蘭敏之奏豫北門修撰卒昌宗官至太子舍人修文館學士撰古文紀年新傳數十篇

崔行功恆州井陘人祖謙之仕北齊終鉅鹿太守徙占鹿泉少好學唐儉愛其才妻以女因倩作文奏高宗時累轉吏部郎中以善

占奏常兼通事舍人內供奉坐事貶游安令又召爲司文郎中與
蘭臺侍郎李懷儼竝主朝廷大典冊初太宗命祕書監魏徵寫四
部羣書將藏內府置讎正二十員書工百員徵徙職又詔虞世南
顏師古踵領功不就顯慶中罷讎正員聽書工寫于家送官取直
使散官隨番刊正至是詔東臺侍郎趙仁本舍人張文瓘及行功
懷儼相次充使檢校置詳正學士代散官以勞遷蘭臺侍郎卒孫
銑尙定安公主爲太府卿初主降王同皎後降銑主卒皎子繇請
與父合葬給事中夏侯銛駁奏主與王氏絕喪當還崔詔可銛猶
出爲瀘州都督行功兄子玄暉別有傳

杜審言字必簡襄州襄陽人晉征南將軍豫遠裔擢進士爲隰城
尉恃才高以傲世見疾蘇味道爲天官侍郎審言集判出謂人曰
味道必死人驚問故答曰彼見吾判且羞死又嘗語人曰吾文章

當得屈宋作衙官吾筆當得王羲之北面其矜誕類此累遷洛陽
丞坐事貶吉州司戶參軍司馬周季重司戶郭若訥構其罪繫獄
將殺之季重等酒酣審言子并年十三襲刃刺季重於坐左右殺
并季重將歿曰審言有孝子吾不知若訥故誤我審言免官還東
都蘇頌傷并孝烈誌其墓劉允濟祭以文後武后召審言將用之
問曰卿喜否審言蹈舞謝后令賦歡喜詩歎重其文授著作佐郎
遷膳部員外郎神龍初坐交通張易之流峰州入爲國子監主簿
修文館直學士卒大學士李嶠等奏請加贈詔贈著作郎初審言
病甚宋之問武平一等省候何如荅曰甚爲造化小兒相苦尙何
言然吾在久壓公等今且歿固大慰但恨不見替人云少與李嶠
崔融蘇味道爲文章四友世號崔李蘇杜融之亾審言爲服總云
從祖兄易簡九歲能屬文長博學爲岑文本所器擢進士補渭南

尉咸亨初歷殿中侍御史嘗道遇吏部尙書李敬玄不避敬玄恨
召爲考功員外郎屈之而侍郎裴行儉與敬玄不平故易簡上書
言敬玄罪敬玄曰襄陽兒輕薄乃爾因奏易簡險躁高宗怒貶開
州司馬審言生子閑閑生甫

甫字子美少貧不自振客吳越齊趙閒李邕奇其材先往見之舉
進士不中第困長安天寶十三載玄宗朝獻太清宮饗廟及郊甫
奏賦三篇帝奇之使待制集賢院命宰相試文章擢河西尉不拜
改右衛率府胄曹參軍數上賦頌因高自稱道且言先臣恕預以
來承儒守官十一世迨審言以文章顯中宗時臣賴緒業自七歲
屬辭且四十年然衣不蓋體常寄食於人竊恐轉灰溝壑伏惟天
子哀憐之若令執先臣故事拔泥塗之久辱則臣之述作雖不足
鼓吹六經至沈鬱頓挫隨時敏給揚雄枚皋可企及也有臣如此

陛下其忍棄之會祿山亂天子入蜀甫避走三川肅宗立自鄜州
羸服欲奔行在爲賊所得至德二年亾走鳳翔上謁拜右拾遺與
房琯爲布衣交琯時敗陳濤斜又以客董廷蘭罷宰相甫上疏言
罪細不宐免大臣帝怒詔三司襍問宰相張鎬曰甫若抵罪絕言
者路帝乃解甫謝且稱琯宰相子少自樹立爲醇儒有大臣體時
論許琯才堪公輔陛下果委而相之觀其深念主憂義形於色然
性失於簡酷嗜鼓琴廷蘭託琯門下貧疾昏老依倚爲非琯愛惜
人情一至玷污臣歎其功名未就志氣挫衄陛下棄細錄大所
以冒死稱述涉近訐激違忤聖心陛下赦臣百死再賜骸骨天下
之幸非臣獨蒙然帝自是不甚省錄時所在寇奪甫家寓鄜彌年
躑躅孺弱至餓死因許甫自往省視從還京師出爲華州司功參
軍關輔飢輒棄官去客秦州負薪采橡栗自給流落劔南結廬成

都西郭召補京兆功曹參軍不至會嚴武節度劔南東西川往依焉武再帥劔南表爲參謀檢校工部員外郎武以世舊待甫甚善親詣其家甫見之或時不巾而性褊躁傲誕嘗醉登武牀瞪視曰嚴挺之乃有此兒武亦暴猛外若不爲忤中銜之一日欲殺甫及梓州刺史章彝集吏于門武將出冠鉤于簾三左右白其母奔救得止獨殺彝武卒崔旰等亂甫往來梓夔閒大曆中出瞿塘下江陵泝沅湘以登衡山因客耒陽游嶽祠大水遽至涉旬不得食縣令具舟迎之乃得還令嘗饋牛炙白酒大醉一昔卒年五十九甫曠放不自檢好論天下大事高而不切少與李白齊名時號李杜嘗從白及高適過汴州酒酣登吹臺慷慨懷古人莫測也數嘗寇亂挺節無所汙爲歌詩傷時撓弱情不忘君人憐其忠云

贊曰唐興詩人承陳隋風流浮靡相矜至宋之間沈佺期等研揣